



EDITORIAL

Kolektibo nga gumios kontra ha "bag-o nga normal" han rehimen Duterte

NAGLALARANG NA AN rehimen Duterte nga utro nga pahilawigon an *lockdown* ha Luzon ngan ha iba nga parte han nasud lahos ha nakatalaan hini nga pagtapos ha Mayo 15. Hini nga panahon, kinahanglan kuno karawton na la han katawhan Pilipino komo "bag-o nga normal" an mga "mala-balaud militar nga mga kundisyon," kun diin grabe nga gintatalapas an ira mga katungod ha ngaran han pagpuyopoy ha Covid-19.

Ha ngaran han "bag-o nga normal," karuyag han rehimen Duterte nga karawton na la han katawhan an nadigurok nira nga tiyan, an hiluagan nga pagkasakit ngan kamatay, wala-tuo nga kurapsyon, mga bag-o nga neoliberal nga palisiya ha ekonomiya, kamadarahug han militar ngan pulis, ngan pagpamingaw ha midya ngan mga kritiko han rehimen.

Diri gud malalauman an rehimen Duterte nga batunon an panginahanglan han katawhan. Waray hira iba nga malalauman kundi an ira pagkaurusa ngan bubligay agud ungbawan an gu-

tom ngan pagkukuri ha "bag-o nga normal" ni Duterte.

Kinahanglan dugang nga pakusgon han katawhan an ira pagkaurusa ngan kolektibo nga gumios pinaagi han ira mga organisasyon masa. Ha mahugot nga paggiya han Partido ngan ha bulig han Bagong Hukbong Bayan, kinahanglan pangunahan han rebolusyunaryo nga organisasyon masa han parag-uma an kampanya ha produksyon ngan buruhaton ekonomiya, buruhaton medikal, propaganda-edukasyon, ngan pagdepensa han ira baryo kontra ha kaaway. Singabuton an higayon nga igpahira an masa nga parag-uma ha pamumuno ngan paggubernuhan agud mahibaro hira tiunan-o ginsosolbar an mga praktikal nga problema ngan araba han ira molupyo. Ha sugad, naiisa an ira pamplitika nga kapukawan, militansya ngan organisado nga paggios.

Kun solido ngan papitad-pitad ini nga mahihimo, mapapadig-on an Pula nga poder ha kabaryuhan para ha dugang nga rebolusyunaryo nga pagpasulong. ■

RCSP han 20th IB ha Las Navas, padayon

PADAYON TUBTUB YANA an mga operasyon nga Retooled Community Support Program (RCSP) han 20th Infantry Battalion-Philippine Army kontra ha mga parag-uma ha kabaryuhan han Las Navas, Northern Samar, sigon ha Bagong Hukbong Bayan-Rodante Urtal Command (RUC).

Basar ha mga report nga nakarawat han BHB-RUC, ginpangunahan ni 1st Lt. Daniel Salvador Sumawang an pagsensus ha gatus-gatos kapamilya ngan pan-gigipit ngan interogasyon ha dose-dosena ha mga baryo han Quirino, San Francisco, Perez ngan San Miguel ha butnga han krisis han Covid-19 tikang pa hadton Marso 9.

Ha ngatanan nga baryo, waray pagsarit nira nga ginkukuhaan han ritrato an mga naukoy ha kada balay ngan bisan an mga ritrato nga naka-*display* ha sakob. Ginpipilit liwat ha may purtahan kun pira an aada yana ha balay. Ginhihimo naman an pagsensus ngan mga interogasyon ha katutngaan han gab-i.

Ha Brgy. Quirino, inabot ha 317 nga pamilya an ha pagsensus han militar ha pangunguna ni Lt. Sumawang. Naghimo liwat an mga sundalo han mga tsekpoynt agud bantayan an mga nagawas-sakob nga mga taghimaryo. Gin-interogar nira an maabot 10 nga parag-uma ngan pwersahay nga ginpasurender an 20 katawo. Perwisyo liwat ha masa an paghubog ngan paghuygo han mga tropa. Ginhimo

“Kota” ha panhatag han ayuda, ginsolbar han OM

NAGBUBURUBLIGAY AN MGA parag-uma ha Northern Samar pinaagi han ira mga organisasyon masa agud solbaron an kakulang han pinansyal nga ayuda nga ginhatag han rehimen Duterte para ha mga naapektuhan han krisis ha Covid-19.

Ha Barangay Ipil-ipil (diri ungod nga ngaran), 38 la ha 64 nga pamilya ha baryo an nakatalaan nga kumawat han P5,000-8,000 nga pinansyal nga ayuda ilarum han Social Amelioration Program (SAP). Baynte-sais nga pamilya an waray unta makakarawat nga ayuda. Sugad han iba nga barangay, napiritan nga magtalaan han "kota" han mga benepisyaryo an mga lokal nga gubyerno tungod kay kulang an pondo tikang ha nasyunal nga gubyerno.

Mahinay liwat an distribusyon

han ayuda. Ha datos han rehimen, hadton Mayo 1, masobra 10 milyon pa la hin 18 milyon nga pamilya (56%) an nahahatagan han ayuda pinaagi han SAP. Hadton Marso pa gin-anunsyo an nasering nga programa kundi ini pa la nga ihap han mga kaapi han Pantawid Pamilya Pilipino Program (4Ps), mga diri kaapi han 4Ps, ngan pira nga drayber han *jeepney* an nahatagan han ayuda. Samtang, nagpabilin gihapon an mga *lockdown* ngan paralisado an pagpakabuhi han katawhan.

Napagkaurusahan han organisasyon masa (OM) han mga parag-uma ha Brgy. Ipil-ipil nga kinahanglan ngatanaan nga pamilya mayda makarawat bisan guti nga pinansyal nga ayuda. Nagdesisyon an organisasyon nga tirukon an kwarta nga nakarawat han mga benepisyaryo ngan babhinun ini ha ngatanaan nga pamilya ha baryo. Ha P190,000 nga natirok han OM, kumawat an ngatanaan nga pamilya hin P2,368, lakip man ha "kota" o diri. Hini nga kwarta, gintirok pa an P68 ngan ginhatag ha kapitan han barangay komo ipamasaha ngadto ha bungto para mamalit han epektos ngan iba pa nga panginahanglan han taghimaryo.

"Kota...", "sundan ha paypay 3

"Las Navas...", "tikang ha paypay 1

liwat hira nga surugon ha pagbunak ngan paragkuha han kahoy.

Ha Brgy. San Francisco, ginpangunahan han usa nga 2nd Lt. Cateil an interogasyon ha tulo nga barangay kagawad ngan 21 pa nga parag-uma. Nagreklamo naman han saywar ngan pwersahay nga pagpasurender an maabot 25 nga residente, samtang 30 kapamilya an ginsensus. Usa nga parag-uma nga gin-ngangaranan nga "Marlon" an gintilo han sundalo nga hubog. Naghuygo liwat an mga tropa ha baryo.

Ha Brgy. Perez, ha pangunguna ni 2nd Lt. Jocris Adlawan, maabot 80 nga pamilya liwat an gin-interogar han militar ha ngaran han pagsensus. Kada usa naman nira nga gin-interogar an pito nga barangay kagawad ngan upat nga parag-uma. Nagbutang liwat hira han mga tsekpoynt agud bantayan an gawas-sakob han mga tawo hadton nga nagpatron ha baryo.

Ha Brgy. San Miguel, ginpangunahan han usa nga Sgt. Agosto, kumander han mga sundalo nga nag-operasyon ha baryo, an huygo ngan bulang didi.

Kontrainsurhensiya ha butnga han Covid-19

Ha iba nga parte han isla han Samar, padayon gihapon an kampanya kontrainsurhensiya han 8th Infantry Division ha luyo han krisis han Covid-19.

Ha Northern Samar, naghimo han operasyon kombat an tulo kakolum han mga tropa han 20th IB tikang ha Brgy. Opong, Catubig ngadto ha mga baryo han Manering ngan P. Rebadulla han pareho nga bungto tikang Marso 19-23. Usa nga kolum hini an dini-

retso ha Brgy. Siljagon, Mapanas. Gintalapas hini nga operasyon an unilateral nga ukoy-bubto han rehimen Duterte nga epektibo tubtub Abril 15.

Usa naman nga parag-uma an iginistraping han mga sundalo ha Brgy. Bagacay, Palapag hadton Abril 18. Nasamaran la an biktima.

Ha Eastern Samar, naghimo han operasyon militar an 78th IB hadton ikatulo nga semana han Abril. Gindakop han mga sundalo an upat nga parag-uma nga ira gihapon ginbuhian. ■



Buwa nga balita han 8th ID

Mga pagbinuwa hiunong ha reyd ha Catubig

Sobra nga mga habersak

Sigon ha 20th Infantry Battalion-Philippine Army, nakakumpiska ini han maabot 20 nga habersak ha reyd hini ha kampo han Bagong Hukbong Bayan ha Brgy. P. Rebadulla, Catubig, Northern Samar hadton Abril 23. Kundi sigon ha sumat nga nakarawat han BHB-Eastern Visayas (Efren Martires Command o EMC) tikang ha nadabi nga yunit han BHB, upat la nga habersak an nahibilin hin umatras hira ha agway. Diri kanan BHB an mga aada ha ritrato nga ginpagawas han 20th IB ha *social media*.

Ginpatay nga parag-uma

Ginrarakudako liwat han 20th IB nga nakapatay ini han usa nga Pula nga mangaraway hadton Abril 24 ha kunohay aragway kontra hini ngan han yunit han BHB nga umatras tikang ha reyd ha P. Rebadulla. Kundi sigon

ha BHB-EMC, usa nga parag-uma nga hi Jeric, residente han Brgy. Nagbob-tac, Palapag, Northern Samar an ginpatay han militar. Gintanoman la hiya han KG-9 nga masinggan ngan ginpresentar komo Pula nga mangaraway.

Pauru-utro nga alegasyon

Gindiwara naman han BHB-EMC komo "basura" an alegasyon ni Maj. Gen. Pio Diñoso III han 8th Infantry Division nga ebidensya han pangabuso han kababayin-an ha BHB an mga *birth control pills* nga nadiskubre ha kampo ha P. Rebadulla. Ha usa nga pahayag, ginbuksas ni Karlos Manuel, tagapagyakan han BHB-EMC, nga una na ini nga ginalegar han militar ha Mindanao ngan gin-uuru-utro na la agud pakarauton an BHB ha iba nga rehiyon. Ginsumat liwat niya an

usa nga report tikang ha *Ang Bayan* kun diin ginpapapila han mga sundalo an kababayin-an nga Lumad ha gawas han ira detatsment ha Davao del Norte agud makapili kun hin-o an karuyag nira igreyp. **L**



"Kota...", *tikang ha paypay 2*

Ha Brgy. Langka naman, mayda 12 nga pamilya an waray mahilakip ha "kota" han gubyerno. Kundi pinaagi han suok nga paggiya ngan maduroto nga pag-eksplikar han OM, nagdesisyon an mga nakatala-an nga benepisyaryo nga mag-aragmot hin tag-P600 para ihatag ha mga waray nakarawat.

Ha pareho nga baryo, maungod ngan mahiroto nga ginpangunahan han OM an pagpanginano ha ayuda. Ha Brgy. Ipil-ipil, gin-urusa han OM an mga residente han barangay kun kay ano kinahanglan tagdon liwat an mga hipid nira nga waray nakarawat nga ayuda. Gin-giyahan liwat han OM an mga upisyal han barangay ha pagpanginano han

dako kaupay nga balor han kwarta agud pukaw nga malikyan an kurapsyon. Ginsubaybayan han mga kaapi han bataan nga organo han Partido (BOP) an pagbug-os han OM han desisyon. Binulig liwat an lokal nga yunit han BHB ha paggiya ngan pag-urusa ha mga taghimaryo.



Ikaduha, ginseguro han OM nga sikreto nga ginhimo an pagtirok ngan panhatag han ayuda, ngan diri ini mahibaruhan han munisipal nga gubyerno. Tungod ini kay gindidid-an han nasuyunal nga gubyerno an mga lokal nga upisyal nga mag-inisyatiba ngan tipahan an mga pagsurundon hini kabahin ha panhatag han ayuda, bisan pa para ini ha kaupayan han ira mga molupyo. Gindidid-an hini an pagigin mahimuon ngan an bubligay han katawhan ha panahon han krisis.

Gintatalinguha na han mga OM ha iba nga baryo an sugad nga organizado nga pagtagad ha nakarawat nga ayuda. Samtang, nangangandam na an OM ha Brgy. Ipil-ipil nga pangunahan an iba nga buruhaton han organisasyon kontra ha Covid-19, sugad han kampanya han produksyon ngan paghimo han *herbal garden*. **L**